

Mark Twain

Mark Twain, wat deur talle mense as een van die grootste Amerikaanse skrywers van alle tye beskou word, was die skepper van twee van die mees geliefde karakters in Amerikaanse **fiksie**, Tom Sawyer en Huckleberry Finn. Twain het met fyn humor [boeke](#), artikels en opstelle oor die samelewing, politiek en die mens se natuur geskryf. Hy was egter nie net 'n skrywer nie, maar ook 'n **rivierbootloods**, **verslaggewer**, spreker en **entrepreneur**.



Grootwordjare

Mark Twain is op 30 November 1835 in Florida, 'n baie klein dorpie in Missouri in die Verenigde State van Amerika (VSA), gebore. Sy geboortenaam was Samuel Langhorne Clemens. Toe hy vier was, het die familie na Hannibal, 'n effens groter dorp, getrek, waar hy sou woon tot hy 17 jaar oud was. ¹ Twain is vroeg gebore en was vir die eerste 10 jaar van sy lewe gereeld siek. ²

Twain was die sesde van sewe kinders van John en Jane Clemens. ³ Sy pa was 'n winkeleienaar en **magistraat**. Pa John was baie **stug**, en volgens oorlewering het Twain nooit sy pa sien lag nie. Sy ma, aan die ander kant, was prettig en saggeaard. Sy het graag vir die kinders [stories vertel](#). ¹ Twain het waarskynlik sy skryftalent en sin vir humor by sy ma geërf. ²



Die Mark Twain-hotel.

Toe Twain 11 jaar oud was, het sy pa gesterf. Die familie was hierna vir jare **brandarm**. ³

Twain se kinderjare in Hannibal was terselfdertyd opwindend, onstuimig én vervelig. Hannibal was in daardie tyd 'n lewendige dorpie langs die Mississippi-rivier. Die [stoomskepe](#) wat op en af met die rivier handel gedryf het, het drie keer per dag daar gestop. Daar was 'n **mengelmoes** van mense, en straatmusikante,

winkeliers en ambagsmanne het hul werk net so op straat gedoen. ¹ Die dorpie was aan die een kant bedrywig en romanties, maar aan die ander kant arm, met heelwat [geweld](#). ⁴ Twain het, byvoorbeeld, toe hy daar gewoon het, gesien hoe iemand op straat doodgeslaan word. ¹



Mark Twain-riverboot by Disneyland.

Hannibal was die inspirasie vir die dorpie St. Petersburg in *The Adventures of Tom Sawyer* (1876) en *The Adventures of Huckleberry Finn* (1884). ¹

Slawerny was deel van die 19de-eeuse wêreld. Voor sy pa se dood het Twain se familie 'n slaaf gehad, en as kind het hy baie tyd op sy oom se plaas deurgebring, waar daar ook slawe was. Hy het graag na hul stories en volksliedjies geluister. Die slaaf in *Huckleberry Finn*, Jim, is op hierdie **interaksies** gegrond. ³

Vroeë werksjare

Twain moes op 12-jarige ouderdom skool verlaat omdat sy ma hom nie meer kon onderhou nie. ¹ Vir die volgende ses jaar het hy as winkelklerk, **bode**, **leerlingsetter**, drukker en skrywer gewerk. ⁴ Hierdie verskillende soorte werk het baie swak betaal: as leerlingsetter is hy byvoorbeeld slegs met kos betaal. Toe hy 15 was, het sy broer, Orion, vir hom 'n pos as drukker by sy koerant, *Hannibal Western Union*, gegee. Twain het ook vir hom artikels geskryf, ¹ en dis hier waar hy die eerste keer besef het dat hy van skryf hou. ⁵



Toe Twain 18 was, het hy na New York City en Philadelphia gereis, waar hy by 'n paar koerante as drukker gewerk het. ³

In 1857, toe hy 21 jaar oud was, het een van sy groot drome waar geword: hy het geleer om 'n stoomboot op die Mississippi-rivier te bestuur. Teen 1859 was hy 'n gelisensieerde loods. ¹

Twain was **in sy element**: die werk was opwindend en het goed betaal, en loodse het hoë status geniet. Sy ervarings op die rivier was deel van die inspirasie vir 'n reisboek wat dekades later verskyn het, *Life on the Mississippi* (1883).⁵

Dit was in hierdie tyd dat hy sy naam verander het na Mark Twain. Die woord "twain" beteken letterlik "twee". As 'n rivierbootloods sou Sam Clemens die hoofbootman gereeld "Mark twain!" hoor roep het - 'n ou term wat deur bootloodse gebruik is om te sê dat die boot nou in veilige water is. Dit het beteken die water was twee vaam (12 voet, oftewel sowat 3,6 meter) diep.⁶



In 1861 het die [Amerikaanse Burgeroorlog](#) uitgebreek en die bote kon nie op die rivier vaar nie. Twain het as vrywilliger aan die **Konfederasie** se kant aangesluit,¹ maar binne twee weke **gedros**.³

Twain trek wes

Twain het besluit om sy **fortuin te gaan soek** in die Amerikaanse state Nevada en Kalifornië in die Amerikaanse Weste. Hy sou vir die volgende vyf jaar daar woon.¹

Op pad het hy 'n klomp nuwe mense ontmoet, onder meer inheemse Amerikaners. Hierdie mense en sy ander ervarings het later deel gevorm van *Roughing It*, 'n **semi-outobiografiese** reisboek wat in 1872 gepubliseer is.³

Twain wou sy familie uit [armoede](#) lig en het gehoop om geld te maak as **prospekteerder**. Teen die middel van 1862 kon hy egter sien dat dit nie so sou uitwerk nie, en hy was heeltemal **platsak**.¹

Hy het 'n pos as **verslaggewer** by die *Territorial Enterprise*, 'n koerant in Virginia City, Nevada, aanvaar.¹ In 1864 het Twain nog verder wes getrek, hierdie keer Kalifornië toe.⁷



Roem

Twain het gou een van die bekendste storievertellers in die Weste geword. Hy het 'n kenmerkende vertelstyl gehad: vriendelik, snaaks, en ook soms oneerbiedig en satiries. ¹

In 1865 het hy sy eerste groot deurbraak gehad: 'n mynstaaltjie wat hy neergeskryf het, getiteld *Jim Smiley and His Jumping Frog*, ¹ ook bekend as *The Celebrated Jumping Frog of Calaveras County*. Hierdie **staaltjie** is in koerante en tydskrifte landwyd gepubliseer. ⁴



In 1865 is hy deur die *Union*, 'n koerant in Sacramento, Kalifornië, gehuur om die Sandwich-eilande (vandag se Hawaii) te besoek en reisartikels daarvoor te skryf. ³ Sy artikels was só gewild dat hy ná sy terugkeer 'n suksesvolle sprekerstoer gedoen het. ⁸ Hierdie artikels en praatjies is jare ná sy dood gepubliseer as *Letters from the Sandwich Islands* (1938) en *Letters from Honolulu* (1939). ⁴



In 1867 is hy op 'n vyf maande lange bootrit deur die [Middellandse See](#) gestuur. ¹ Sy reisbriewe en artikels daarvoor is propvol skitterende beskrywings en skerp waarnemings. Dit was só gewild dat dit in 1860 gepubliseer is as *The Innocents Abroad*, ³ 'n boek wat 'n topverkoper geword het. ¹



Twain saam met John T. Raymond, die akteur wat kolonel Sellers gespeel het in die verhoogproduksie van Twain se "The Gilded Age".

Twain was nou 'n gevestigde skrywer, en een van die gewildste skrywers in die VSA. ¹

Roughing Up, die boek oor sy reis wes, is in 1872 gepubliseer, ⁴ en *The Gilded Age* in 1873. Laasgenoemde is 'n satiriese **roman** oor die **korrupsie** en

gretigheid van ryk mense. ³

Dit is **ironies** dat Twain 'n **satire** oor ryk mense geskryf het, want hy het in hierdie stadium self in daardie sirkels begin beweeg. ⁸ Gedurende dieselfde tyd het die Twain-gesin in 'n groot, duur huis ingetrek. ³



Die Hartford-jare

Twain het in 1871 na Hartford getrek en in die volgende klompie jare van sy bekendste boeke geskryf.

The Adventures of Tom Sawyer is in 1876 gepubliseer. Dit was die eerste van drie boeke wat uit sy Mississippi-dae gekom het. Hoewel hy kort ná *Tom Sawyer* met *Huckleberry Finn* begin het, het dit lank geneem om te voltooi – hy het dit gereeld opsygesit. *Life on the Mississippi* is in 1883 gepubliseer. ¹



Vyftig mans staan op die massiewe stomp van die Mark Twain-boom.

Huckleberry Finn is uiteindelik in 1885 gepubliseer. ² *Huckleberry Finn* speel af op die rivier, en is 'n boek wat slawerny en die swak behandeling van swart mense in die VSA aanpak. ³

Sy ander boeke wat in hierdie tyd gepubliseer is, bevat ook kritiek op die samelewing: in *The Prince and the Pauper* (1881) word verhoudings tussen mense van verskillende klasse **onder die loep geneem**, en *A Connecticut Yankee in King Arthur's Court* (1899) kritiseer **onderdrukking**. ⁴



Geldelike probleme en openbare eer

Twain se boeke het goed verkoop. Hy het egter swak besluite ten opsigte van sy

finansies geneem en was gereeld **in die knyp** as dit by geld kom. ³

Hy het byvoorbeeld 'n **uitgewersfirma** begin, wat onder andere die oorlede Amerikaanse president Ulysses S. Grant se **memoire** gepubliseer het. Sy sakebedrywighede het egter nie wins gemaak nie, ¹ en Twain is in 1894 **bankrot** verklaar. ³

Tussen 1895 en 1896 het hy 'n sprekerstoer in Europa gedoen om geld in te samel om sy skuld af te betaal. ¹



Mark Twain by lede van die Laerhuis.

Hy het steeds geskryf, soos die [roman](#) *The Tragedy of Pudd'nhead Wilson* (1894), asook [kortverhale](#) en opstelle. ¹ In sy skryfwerk het hy homself skerp uitgespreek oor sake van die dag, soos **anti-Semitisme**, [imperialisme](#) en slawerny. ²

Vir sy skryfwerk het hy in die laaste 15 jaar van sy lewe baie hulde ontvang. Hy het byvoorbeeld **eredoktorsgrade** ontvang van die Oxford-Universiteit in Brittanje en die Yale-Universiteit in die VSA. ¹



Twain was waarskynlik die beroemdste Amerikaner van die laat 19de eeu. Oral waar hy gegaan het, selfs oorsee, wou mense van hom foto's neem en het skares hom toegejuig. ¹

Persoonlike lewe

Twain was 'n aantreklike rooikopman, met 'n vriendelike, **innemende** persoonlikheid. Hy kon egter ook **uitgeslape** en selfsugtig wees. ¹

In 1867 was hy op reis toe hy sy toekomstige swaer, Charles Langdon, ontmoet. Langdon het vir hom 'n foto van sy suster Olivia (Livy), gewys, en Twain het op die foto verlief geraak. Hy en Livy het in 1868 begin uitgaan en in 1870 getrou. ³

Twain was baie ingenome met sy nuwe vrou. Die Langdons was 'n ryk, statige familie en Livy was **vroom** en deftig. ¹



Twain is in 1870 met Olivia Langden Clemens getroud.

Ná die troue het hulle eers in Buffalo, New York, gewoon, en in 1871 na Hartford, Connecticut, getrek. ³

Hulle het vier kinders gehad, maar tragedie het sy gesin dikwels getref. Sy oudste seun, Langdon, het in 1872 aan **witseerkeel** gesterf, toe hy net 19 maande oud was. Sy oudste dogter en Twain se gunsteling, Susy, het in 1896 op 24-jarige ouderdom aan **meningitis** gesterf. Haar dood het hom diep getref, ook omdat hy landuit was toe dit gebeur het. Sy jongste dogter, Jean, het aan ernstige **epilepsie** gely en in 1909 op 24-jarige ouderdom aan 'n hartaanval gesterf. Twain en sy middelste dogter, Clara, se verhouding was swak en hulle het gereeld rusie gemaak. ¹



Mark Twain se vrou, Livy, en hul drie dogters.

Livy het in 1904, ná 'n lang siekbed, gesterf. Hulle was vir 34 jaar getroud. Historici is verdeeld oor hoe sterk hul verhouding was. Hy het wel baie tyd weg van haar af spandeer, maar daar is ook bewyse dat hy wel vir haar lief was. ¹



Laaste jare

Twain se finansiële probleme ná 1894 het hom baie pessimisties gelaat. ¹ Sy skryfwerk het al hoe meer oor negatiewe sake gehandel, onder meer hoe gretig en wreed mense was. Hy het graag die foute van bekende openbare figure uitgewys en die regering gekritiseer. ³

As openbare figuur was hy gaaf en vriendelik, maar hy was kortaf met sy vriende en geliefdes. Hy het wel baie geskryf, maar het gesukkel om enigiets te voltooi. Sy

geheue het ook swakker geword. ¹



In sy laaste jare het hy woedebuie gehad en was met tye erg **paranoïes**. Tussenin is hy deur stadiums van traagheid en **depressie** lamgelê. Hy het vir ure lank niks gedoen het nie, of wou net in die bed lê en lees of kaartspeel. ¹



Ná Livy se dood het hy eers New York toe getrek, en toe in 1908 na Redding, Connecticut. ³ Hy het op 21 April 1910, in die ouderdom van 74, aan 'n hartaanval gesterf. ¹



Mark Twain (middel), saam met George Alfred Townsend (links), en David Gray, redakteur van die Buffalo Courier.

Lys van Mark Twain se boeke

'n Paar van Mark Twain se bekendste boeke sluit in:

- *The Innocents Abroad* (1869)
- *Roughing It* (1872)
- *The Gilded Age* (1873)
- *Tom Sawyer* (1876)
- *Life on the Mississippi* (1883)
- *Huckleberry Finn* (1884)
- *A Connecticut Yankee in King Arthur's Court* (1889)
- *The Tragedy of Pudd'nhead Wilson and Those Extraordinary Twins* (1894).



Nalatenskap

Soos alle goeie skrywers het Mark Twain die skitterende vermoë gehad om mense dop te hou en dan oor sy waarnemings te skryf. Hy het geskryf oor die goeie en die slegte, die romantiese en die werklike, en die sterk en swakpunte van 'n [gemeenskap](#) in 'n 19de-eeuse wêreld wat baie vinnig verander het. ³

Twain was 'n baanbreker. Hy het in mense se gewone omgangstaal geskryf, en was moontlik die eerste groot skrywer in die VSA wat gewone mense op 'n duidelike, realistiese manier uitgebeeld het. ¹



Die grafte van Olivia Langdon Clemens en Mark Twain.

Hy is vandag steeds die bekendste Amerikaanse skrywer van die laaste helfte van die 19de eeu, en hy het diegene wat ná hom gekom het, geïnspireer. Ernest Hemingway, nóg 'n beroemde Amerikaanse skrywer, het na sy invloed verwys toe hy in 1935 gesê het: "Alle moderne Amerikaanse letterkunde begin by een boek van Twain, genaamd *Huckleberry Finn*." ¹



Die Mark Twain House in Hartford, Connecticut, is 'n toeristeaantreklikheid en historiese landmerk.

Woordbank

anti-Semitisme	Om Joodse mense te haat.	
bankrot	Wanneer 'n persoon of maatskappy nie meer sy/haar skuld kan betaal nie, word dit/die persoon bankrot verklaar.	
brandarm	Om baie arm te wees.	
bode	Boodskapper.	

depressie	Terneergedruktheid van die gemoed; ernstige bedruktheid/neerslagtigheid wat iemand laat dink daar is geen hoop vir die toekoms nie.	
entrepreneur	Iemand wat sy of haar eie besigheid/onderneming begin.	
epilepsie	'n Beensiekte waar die elektroniese impulse van die brein onreëlmatig is en dit tot aanvalle lei waar die lyf gewoonlik onbeheersd ruk.	
eredoktorsgrade	'n Mens kry 'n eredoktorsgraad vir uitsonderlike prestasies, maar jy hoef nie 'n eksamen af te lê nie.	
fiksie	Literatuur, veral prosa, wat 'n beskrywing van denkbeeldige mense, dinge en gebeure gee; denkbeeldige voorstelling; verdigsel; versinsel (het dus nie regtig gebeur nie, die mense en plekke bestaan nie werklik nie).	
fortuin (te gaan) soek	Om iewers heen te reis in die hoop om rykdom en sukses te behaal.	
gedros	Sonder toestemming wegloop, veral uit die weermag.	
imperialisme	Die politieke beleid van 'n staat om ander gebiede onder sy mag en invloed te bring.	
in die knyp	In die moeilikheid.	
in sy element	Om op 'n plek te wees waar jy heeltemal tuis voel en werk doen waarvoor jy lus het en bekwaam is om te doen.	
innemende	Lief en vriendelik.	
interaksies	Wisselwerking, aksie en reaksie tussen mense; gedrag, optrede, houding teenoor mekaar; direkte kontak van aangesig tot aangesig.	
ironies	Wanneer die teenoorgestelde gesê word van wat bedoel word.	

Konfederasie	Die elf state in die suide van Amerika wat teen die noordelike state geveg het in die Amerikaanse Burgeroorlog (1861-1865).	
korrupsie	Oneerlike optrede om jouself of 'n ander te bevoordeel; die gebruikmaak van omkoping of die meedoen daaraan.	
leerlingsetter	Iemand wat leer hoe die letters en simbole geplaas moet word voor 'n dokument gedruk word.	
magistraat	Iemand, gewoonlik 'n regsgeleerde (prokureur/advokaat), wat in 'n plaaslike hof as regter werk en uitspraak oor minder ernstige misdade en regsake gee.	
memoire	Lewensverhaal.	
mengelmoes	Verskeidenheid, allerlei, versameling.	
meningitis	Ontsteking van die harsing- en rugmurgvlies.	
onder die loep geneem	Iets noukeurig ondersoek.	
onderdrukking	'n Groep mense onregverdig of wreed behandel en hulle nie dieselfde regte gun as wat ander mense in die gemeenskap het nie.	
paranoïes	Die abnormale neiging om ander te wantrou.	
pittige	Snaaks, humoristies, amusant of vermaaklik.	
platsak	Sonder geld.	
prospekteerder	Iemand wat (as beroep) oral op plekke en in die aardlae rondsoek na ertse, minerale of edelgesteentes.	
rivierbootloods	Die bestuurder van 'n skip.	
roman	'n Lang prosaverhaal met karakteruitbeelding en omgewingsbeskrywing wat uitvoerig en indringend geskied.	
satire	Om mense se probleme en dwaashede op 'n spottende manier voor te stel.	
semi-outobiografiese	'n Boek waarvan groot dele, maar nie alles nie, oor die skrywer se lewe handel.	

slawerny	Handel in slawe; gebruik van slawearbeid.	
staaltjie	'n Grappige verhaal.	
stug	Nors, stug, strak, stroef, stuurs.	
uitgeslape	Slim en slinks.	
uitgewersfirma	Firma wat boeke en tydskrifte publiseer en versprei.	
verslaggewer	Iemand wat vir 'n koerant/tydskrif/radiostasie/TV-kanaal/webblad nuusverslae skryf; verslaggewer.	
vroom	Godsdienstig; onskuldig.	
witseerkeel	Kwaadaardige, aansteeklike keelsiekte wat ook in die neus, oog en slukderm voorkom.	

Lees dié artikels om meer te leer

- [Lees oor Mark Twain](#)
- [Die storie van Mark Twain se lewe](#)
- [Feite en aktiwiteite om meer te leer van Mark Twain](#)

Video's om jou kennis te verryk

Die lewe van Mark Twain

Mark Twain, die vader van humor

Die storie van Huckleberry Finn

The Adventures of Tom Sawyer (volledige rolprent - 1938)

The Adventures of Tom Sawyer (volledige rolprent - nuwe weergawe)

Mark Twain was bekend vir sy pittige en wyse sêgoed